

四庫全書

史部

欽定四庫全書

史部

行水金鑑卷一百六十二至五

詳校官監察御史臣王爾烈

刑部郎中臣許兆椿覆勘

總校官知縣臣繆琪

校對官典簿臣郭祚熾

謄錄監生臣查浩

欽定四庫全書

行水金鑑卷一百六十二

江南按察使傅澤洪撰

兩河總說

七月初一日催山轎入山因前大雨水衝壞山路石塊壘塞下橋步行崎嶇之至過十八盤二十里始抵青柯坪過陡山盤上千尺嶂百尺峽二仙橋元帝殿又上老君犁溝轉折至北嶺上坐片時下宿道院

初二日畧領大概疲極而止息忽回寓燈下閱志書
有云華山三峰南曰落雁峰李白登之歎曰呼吸之
氣可通帝座恨不攜謝朓驚人句來搔首問青天耳
東曰明星玉女峰西曰蓮花峰其間名勝甚多恐悞
長行未能作數日盤桓書之以志吾恨

初三日從華陰東門東北行十五里渡渭河北河東
行不遠即入黃河又北行二十里過洛河不甚濶水
亦濁五里至趙渡鎮二十里到朝邑縣大西門宿河

自龍門而南繞於邑左逕跨洛鎮金水今廢經趙渡
鎮注洛水經金龍渡注渭水三水滙東南一巨浸也
世稱三河口洛源出延安子午谷經邠州洛川中部
過白水蒲城同州至趙渡鎮入於河

初四日從朝邑縣北行土岡數里上岡入谷時出時
入如是者四十里至良女鎮岡上人家斷續又從土
山溝西北行三十里至北當又四十里至郃陽縣宿
城隍廟是日約行百餘里道路紆折上坡下坡有極

陡之處且久旱鬱熱灰土蒙面甚難行也夏陽渡縣
東南四十里韓信擊田豹木罌渡軍處秦晉要津也
初五日出邵陽縣北門東北溝行漸高復下坡過深
溝甚陡有流水上坡甚遠四十里至北良鎮又下深
溝過澗水上大坡十里至大棗鎮有玉皇殿亦土窯
石山頂上山係土山鉾削如石峰巒起處極聳秀林
木邨寨窯洞亦多望原上層層如盤皆田也又十里
到芝川鎮係舊韓城縣城雖小皆瓦房人烟稠疊鎮

西南高阜處有漢太史司馬遷墓上有司馬廟極雄壯下坡穿城出北門半里許有牌坊係白樂天故宅西面上山林木蔥鬱東望黃河僅里許東岸高岡如山乃山西境也又里許有張太保大塋內多樹木亭臺路旁兩邊地土膏腴值旱即取井水灌溉井亦多農亦勤人家亦稠密東邊臨河處亦有高原如山直至韓城縣城亦壯麗四望皆山濠水芝水環繞入河二十里間風景迥異經月之行未之見也是日宿韓

城縣濠水出麻羨嶺西北來入河芝水出方山東南
入河龍門者韓北境之山也禹鑿山而壑之以通厥
流若門然山海經謂應龍相云故于門上加龍字盖
歸功于神也宜川縣有埽工

初七日出韓城北門東北行二十里脊村鎮五里潘
莊五里後潘莊五里謝村二里臨皋村三里李村五
里夏餘口三里喬南村十里朱頭村十里到龍門從
縣來三十里許東岸汾河入河處一路村庄皆好廟

宇亦多喬南村多高樓云發科甲者此為最盛大約東通大河環轉村北從龍門梁山來脈甚壯麗故也朱頭村大磚石城亦龍門前之大鎮也登大石巖謁禹廟巖石如拳疊覆水上對岸大石巖豎立高聳亦有禹廟高泉乃龍門之口雄壯特甚後覆大山高峻大斧劈石天工巧妙令人驚愛後面之山亦雄厚西岸梁山麻皮皴法高峯秀拔一望西北秀山無盡矣水則盤旋而出勢亦銳渡則棹入口內借東僻急溜

而下船皆方橫出口亦異登岸東南行十里清澗大鎮十里到河津縣西門宿龍門在縣西北二十五里兩山壁立東西濶八十步一云禹門汾源東至太行西入於河黃河縣西十五里禹墳龍門前里許中流石磧挺然大水不沒按禹葬會稽蓋因異俗傳之

初八日出河津縣南門西南行二十里渡汾水龍門在西北東面土原西臨黃河十里雙營鎮南行沿河二十里原上有湯陵西岸高原即韓城境漸入土谷

行數里有破關口云穆陵關魚考五里有漢武秋風樓有碑今没入河矣又二十五里至滎河縣南門宿黃河距城西百丈許汾河縣北數里后土祠旁西流於河今移河津葫蘆灘南入河

初九日從滎河縣南行土谷中盤旋屈曲路徑如麻五十里下坡至臨晉縣初行十里許近河漸漸東南望中條秦嶺逶迤西岸高岡不斷即邵陽縣境也宿東關

初十日從臨晉縣南行四十里栲栳鎮又西南行三十里至蒲州東關宿歷山州南六十里媯汭二水出馬上有舜井舜廟黃河在蒲津門外今徙去十里涑水渠州東三十里源出絳縣橫嶺山

十一日從蒲州南行二十里漸近黃河繞中隴山頭又東南行沿河三十里南望泰華如屏遠甚谷行數里對潼關又原行四十里至小呂村娘娘廟少坐對岸原內即盤頭鎮矣河亦寬中多淤灘東行二十里

至永東宮鎮宿

十二日從永東宮東行四十里至芮城縣東門岳廟宿

十三日從芮城東門東行三十里下深溝上坡十里
陌底鎮宿

十四日從陌底鎮東南行五里許即沿河行矣兩岸
高原屈曲之甚對岸乃靈寶東境河亦隘一路河灘
行數里下極陡步行三四里行過澗水二道至焦家

村又三十里到平陸縣宿土城坍塌不堪之甚砥柱
峯在三門東迤南中流峭立數仞有老君爐險不可
升上流有列石蓋眇於此渡河

十五日出平陸東門西南行三里下河灘行三四里
上船渡至官道東南繞陝州城行三十里磁鍾鎮四
十五里至峽石驛宿

十六日從峽石鎮上坡東南行因夜大雨路濕難行
二十里觀音堂二十五里土壕鎮二十里至澠池縣

繞南門行二十里舖又五里千秋鎮宿

十七日從千秋鎮東行三十五里至鐵門鎮宿

十八日從鐵門鎮行三十里新安縣又七十里至河南府宿

十九日從洛陽城東北行三十里上邙山二十里下坡到孟津縣宿穀城山舊名替亭縣西六十里聳出岡阜之上瀍水出其下瀍水縣西五十里平地發源東南流六十里至洛陽東南入洛

二十日從孟津縣東北行二十里至孟津渡口古城
惟存基址而已南傍邳山北依大河南北不過三四
里是日東風渡河甚快渡口少隘此二十里內對縣
處河闊有數里中有灘有五六里長二三里闊再西
兩邊高原又隘矣東行沿邳山又寬望邳山盡頭即
鞏縣界過此岸稍高數餘里到孟縣西關宿

二十一日出孟縣北門西北行數里上土坡過石橋
又土谷中行二十五里下坡又二十五里至濟源縣

進南門出西門宿一路柿棗樹極多是日大霧西有
層巒乃王屋一帶也東北是太行皆隱隱望見瀧水
縣西源出莽山其水或斷或續至雙泉寨始盛出琮
山口穿石暗流至勲掌村如溝渠又東至縣西四里
水始洶湧經縣西城下繞流城北又東南入于溴水
古謂之溴今謂之瀧即白澗水武山在西北十五里
姑嫂山在武山北溴水出焉天井如盤在西北石上
有數頃其流若井水自上溢相接而落若倚劒然

二十二日因瀧水漲難渡進西門出東門西北行五里許謁濟瀆廟碑石雖多皆御祭文也從元朝起者傍有古柏枝幹如虬龍稱將軍馬多娑羅樹枝葉茂盛俱合抱者白楊亦多合抱旁有三瀆神祠後有北海神廟亦多御祭碑殿前即東原也俗稱通北海出廟西行三里許有龍潭潭皆蘆葦約二畝許云此源三年來三年去然去來實無定或其年水來民以此種水稻並無大溝通流也又西北行五六里上靈山

北望太行高而平西望王屋則重巒疊嶂峰岫參差
秀拔之甚遙見天壇頂高出諸峯之上是日復至濟
源縣宿

二十三日進濟源縣西門出東門東行三里許段家
園面前一帶俱繞瀧河五里過石橋十五里北望太
行諸峰卓立重重無盡因微雨不甚明白低處即五
龍口沁水出焉廣濟河出此又東南行十里柏鄉鎮
又東行四十里至懷慶府由西門繞南門到東門宿

一路道路寬平濟水低而清直繞城河荷花極盛從南流其勢亦緩廣濟河高而濁東流甚急與清水交處下清上濁高低緩急各行其性絕不相和也丹河縣東北十五里源出澤州界內穿太行曰丹河口唐改懷水南流二十里入沁

二十四日從懷慶東北繞城行三里許渡沁河值水漲流甚濁又七里許過大丹河水亦濁比沁河一半之寬過二十里鋪又五里至許良大鎮又北行十里

到山下丹河南行小丹河名為九道堰實從丹河支
分第一條沿山麓東行淺隘如溝常因水發淤墊以
此濟運甚覺艱難因昨夜大雨泥濘難行四五里許
至湯王廟宿

二十五日早過河內縣治即向東南行過廣濟河橋
瓦屋村龍津橋夾樹頭至溫縣宿是日行五十里

二十六日從溫縣東北行十五里趙堡鎮又十五里
司馬鎮武陟縣界十五里至小司馬十五里至武陟

縣南關宿黃河縣南十五里沁河源出沁州綿山穿太行達濟源合丹水繞武陟縣城北由東而南入于黃河沁河性善變遷衝決之害甚於黃河每年修築不能一勞永逸也

二十七日從武陟縣北關東北行過沁河闊約二三十丈水甚淺且濁繞城東行上南入河東岸即木欒鎮居民稠密約數千家兩面隄岸亦高三十里至修武縣南門過預河橋至西關丹河約七八里寬五六

尺深進西門出東門過小丹河橋河繞城北行又東
行滿澤圖鞏莊鋪萬箱鋪離縣二十里一片平田丹
河兩岸及四野棗柳俱多又過二三村莊至獲嘉縣
西門宿清水河縣北十五里源出輝縣西南小清河
縣南四十里

二十八日進獲嘉縣西門出東門東北行二十五里
至合河鎮北行過石橋橋有九洞不甚高東通大船
又東北行三十里至輝縣宿縣在高原上一路林木

脩竹水溝蘆葦乃水鄉景象也百門泉源出蕪門山
下泉通百道故名一名衛源以衛河發源于此雖以
百門名然實踰千萬不可勝數自山麓平地遍湧石
竇中仰出累累如珠滙為巨陂方廣數頃淵涵澄澈
淨無塵滓上有咸惠王祠殿名清暉外有靈源湧金
噴玉穠翠洗心諸亭亭有古今名賢題咏甚多衛河
縣西即百泉滙流南經新鄉東繞府城北會淇水流
入于隄口經大名府濬縣山東館陶臨清入漕河以

納于海蓮花泉縣西五里突出于地一曰小百泉世傳晉水伏流至此東南入衛卓水泉縣西八里平地湧泉東南入衛三渡縣西四里百泉之支清水縣西南七十里峪河縣西南五十里源發太行山麓

二十九日從輝縣東關北行五里至梅村過此即百門泉陂渟數頃泉如聯珠而上中有清輝閣頗似西湖湖心亭松柏迴繞北倚山麓樓閣殿亭排列于後小山上嘯臺安樂窩亦頽壞從西岸南行看頭閘二

開復回東南行五里許向西步行二里許看禮字閘
水頗猛又西行四里許看智字閘水稍緩又五里許
看信字閘水更緩此三閘俱用兩水門又南五里許
至雲門鎮又東南行三十里到新鄉縣北關過橋黃
河係東西城脚下行也近因水大河面寬有數丈繞
城至東關宿衛河源發蘇門山詩云泉源在左是也
泉通百道湧自山麓石竇及平地水勢屈曲至合河
鎮凡三十里此衛水合小丹處稍行而東逕新鄉北

門民樂橋歷河透曲里二村凡六十五里自此東流
徑賀生屯瀕衛輝府北門一里東入大名濬縣界卓
水源在輝縣城西十里平地湧出經雲門流新鄉縣
合河鎮西北入衛清河源出輝縣西南七十里山陽
鎮東南經獲嘉縣界至新鄉合河店正西與衛合今
自獲嘉境內即會于小丹河此河止存故道每逢雨
集太行萬壑之水匯焉衛水溢出邑西北苦之按改
丹入衛議曰改丹入衛猶改沁入衛也其地形之高

下水勢之緩急泥沙之淤塞開築之阻絕與沁水同
衛不能容沁而受其害矣獨能容丹而受其害乎丹
河源出山西穿太行屹坦坡狄家嶺南注而下中間
分散有十八道小溝渠民間引為灌田總流南經張
店至劉村入沁水首尾三十餘里與衛水相通者係
上下溝渠內東流第二道由清化鎮南有金鎗狗跑
等泉水相聚迤邐而東經修武治南北轉城東門外
又東經獲嘉縣北又東名蔣河至新鄉縣西北名河

店入小清河而因以入于衛相沿凡百餘里名為丹之支流而實非丹水矣若欲將丹水全身由張店改折而東過狗跑泉達衛則丹至張店地勢傾下入沁甚易勢不能挽若從上面東流第二道小溝渠決河達衛則丹正向山嶺而下奔潰傾跌橫截不佳何由東流議者徒欲引丹入衛殺沁一二耳而增衛害十九奚為可哉總之改丹改沁為救徐邳以南漕運計耳而北地運道如充豫芻糧所係療腸內而塞咽喉

此所謂救一河患添一河患也萬厯間總河舒委勘後其事遂寢

八月初一日從新鄉縣稍西行四十餘里至八柳樹店又西南行三十里到原武縣宿

初二日進原武縣城出東門東行二十五里過張家隄口五里至陽武縣北關又東南行過兩道隄到古倫集宿

初三日從古倫集南行至縷隄東行四十里至于家

店十五里荆隆口鎮二十餘里荆隆口大工內有積水隄旁有古黃池碑未詳稍東即柳園頭渡口兩日水漲漫灘竟無渡船又東行二十里到陳橋鎮宿

初四日從陳橋鎮南行七八里上船北風頗厲揚帆破浪自辰至午後到南岸淤灘拖行約兩時始抵灘

岸從淤泥中行四五里至乾岸二十里劉家店又數

里入汴城東門宿

即開封府省城也

初五日撫軍又留住數日

初九日午刻始行三十里至黑江口渡頭水漲流甚急無船可渡行人俱望洋而歎仍回舊寓宿

初十日覓船不得復住一日

十一日早出北門北行三十里上船順風渡甚利三十里到封邱縣宿

十二日從封邱西北行二十里東戴村里許西戴村二十里到延津縣東關東北行二十里過沙門鎮一派沙地滿目荒涼十五里進胙城縣宿黃河故道在

延津縣二十八里明天順間遷于于家店淹沒土地
沙灘黃河原自今之陽武北新鄉西南東北經延津
汲縣胙城至大名府濬縣大伾山北入海即禹貢東
過洛汭至于大伾處胙之河禹之舊跡也周定王五
年河徙矜磔胙流乃塞漢文帝十二年河決酸棗東
南流經封邱入大名府長垣縣至山東東昌府濮州
張秋入海水經所謂東至酸棗又逕東燕縣故城北
是也隋唐以來屢經決溢胙不詳其有無宋熙寧十

年河溢衛州自王供埽至汲懷州等處北流遂絕胙
于是宜無河矣縣圮于河疑在熙寧前也金正大中
復以河患徙縣當是二十年決衛州之時但不知北
流既絕何時而復注也既徙且復湮矣金明昌五年
河犯武城隄泛至金山明年詔鑿新河在今新鄉縣
南復經于胙元自原武決而東南流經陽武封邱茲
流復絕沙沒新州蓋其時也迨至明時遷徙不常皆
未去境內正統十三年大溢仍循陽武故道直抵張

秋景泰四年又徙而南百年來故道皆積沙為患今其遺跡自小店伍疇社新州城棘針舖吳安屯董固班棗丁家莊林家莊等處以至滑縣廣狹不同宛宛可見其經縣南乃決酸棗故道也今自沙門一帶縣西吳安屯至縣西北董固等處積沙綿延數十里皆飛礫走磧之區昨之土田無幾矣沁河故道俗名孟姜女河自武陟縣流經昨境北行與汲縣相接在漢隄西久塞漢隄自新鄉西南入衛境東北至昨城又

北入汲縣小店西南有大隄一股由店南而東蜿蜒
幾百里一股由店西而北入汲縣界一名古陽隄護
河隄自汲縣東接胙城抵直隸滑縣護城隄縣東西
南接延津北抵滑縣

十三日由胙城西北行三十里一派沙地并無樹木
村莊飛沙成堆衰草零落始至一村莊長里許十五
里到衛輝府城郭巍巍舊為潞王府宮牆猶存有望
京樓綠琉璃瓦極高聳下即如村樓四方磚築迴闌

玲瓏進東門出西門過大石橋即衛河也水不甚深
兩沙岸人家稠密至關廂宿衛河在汲縣西源出輝
縣蘇門山南經新鄉東遶府城北會淇水經濟縣達
臨清至天津入海斡脰河源出淇縣西北五里東南
流入衛河昔商紂斡朝涉之脰因名一名太和泉又
名陽河淇水源出林縣西南七十五里闊五步深可
二尺水經注曰淇水出河內林慮縣即林縣西大號山
山海經曰淇水出沮洳山疑大號沮洳一山異名也

綿歷太行而東自濬境西北入界南流至枋頭入衛
水簾洞在青巖山東南層崖上寬廣丈許深可數丈
洞中出泉澄瑩可鑒枋頭城在淇縣南八里衛河北
即淇水口也魏志曹操于淇水口下大枋木以城堰
遏淇水東入白溝以通漕運因名枋頭

十四日從衛輝府出西門東北行十五里官路西三
里許謁比干墓內多古碑夫子書殷比干墓四字出
廟門狂風大作飛沙滿天又行二十五里至界碑有

麥秀古墟碑雨漸大風吹雨如細石撲面又五里過
斷脛河橋又五里有衛多君子碑至淇縣南門外有
殷三仁故里碑東立賢聖君六七故都碑有大牆門
內琉璃殿因雨大不及進謁進南門有柏臺縣治前
書古朝歌雨大衣濕風吹寒甚即宿北門

十五日從淇縣北二十五里至高村橋橋平多孔水
流甚急水從東來折南流箭許過橋漸往西行是日
風雖大喜天霽一路西望諸山甚近峰巒大小不一

水簾洞海子等俱在內三十五里至宜溝驛兩旁多
柳樹有柳廊牌額路旁有扁鵲墓碑有嵇侍中血濺
帝衣坊有墓祠進湯陰縣南門內即岳武穆故里有
廟下店宿蕩水縣北二里源出牟山水經注曰蕩
水東與長沙溝水合二水既合下流河隘難容而洄
水亦時泛溢萬歷初屢潰居民苦之萬歷中郡守常
公由大坡青塚高城改入衛河安瀾數十年歲久壅
淤復屢決害順治十四年知縣康允叔奉府檄疏河

二十里閱兩月竣工刻石記之美水縣北八十里源
出西山水經注曰美水出蕩西北韓大牛泉四十里
流美城北水積成淵方十餘步深丈餘東至內黃與
防水會地理志曰美水至內黃入蕩者也今與蕩水
別流入衛水宜師溝縣西南二十五里即長沙溝也
經晉鄙故壘北以下伏流至小灘出經伏道東北流
至桓人山與蕩水合淇水縣西七十里東流三十餘
里入淇縣界廣潤陂在府東南四十里安湯二縣界

地勢窪下蕩河及萬金渠二水注焉盈則入洹以達于衛後漳水南下塞洹故道陂水不能入洹而洹水反洩于陂陂日益廣當夏秋漲溢沒田數千畝民病之郡守常公覽地形為疏治由葛家莊鑿渠道蕩水至高城河口入衛自枉流橋至楊家莊補築舊隄以障渠水又自戴家溝疏濬陂水入洹於是二水有

歸黃河故道縣東夏莊小張等處

看河紀程

行水金鑑卷一百六十二

欽定四庫全書

行水金鑑卷一百六十三

江南按察使傅澤洪撰

兩河總說

十六日從湯陰縣北行四十里至彰德府陰雨甚久
泥濘難行進南門過萬金渠橋不甚寬從西東流繞
城支分灌溉原入安陽河過鼓樓北門五里至安陽
橋河面四五丈闊又北行四十里至豐樂鎮北臨漳

河下灘四五里至河邊濁水急流北岸埧圯西望羣
山東望林木有曹操疑塚銅雀臺此水往東更寬水
發汪洋地濕難行復回至府宿洹水縣北四里俗曰
安陽河源出上黨洹氏縣洹山在長子縣東過隆慮
北黃水注之又東北出山徑殷墟又東北過鄴城南
謂之新河自鄴東經安陽縣故城又東過內黃縣北
東入于白溝春秋左氏曰聲伯夢涉洹水圖經曰洹
水源出林慮西北平地涌出初甚微小東流九十里

至安陽界泉脈漸大又曲屈東北流六十里至州北
入洹水縣今日洹氏縣在澤州高平然無洹水蓋邑
遷改不常天下之水皆發源于山狀而再發出自平
地濟與百泉是也夫淄澠之合古人能嘗而知之洹
水洑發於林慮浸發于安陽無可疑矣漳水俗曰濁
漳河尚書禹貢曰覃懷底績至于衡漳職方氏曰河
內曰冀州其川漳水經注曰濁漳源出上黨長子縣
西之發鳩山東過縣南合堯水梁水曲屈從縣東北

流東過壺關屯留潞縣合衆水其流頗大又東過武
安縣東清漳出樂平南少山自涉縣東南來注之世
名其處曰交漳口遂東過鄴縣西而東徑三戶峽為
三戶津又東而汗水注之又東徑西門豹祠自祠北
徑趙閼馬臺西遂自縣東北入滏陽縣即今磁州
之東北有永樂浦浦西五里俗謂之祭陌河即西門
豹投巫處在安陽界魏武帝引入鄴城經銅雀臺下
水激有聲不絕長鳴溝在臨漳縣西門豹史起李仁

偉所作引水渠曰西門曰天平曰金鳳曰菊花曰望

雲曰百陽

皆天

曰天井曰利物今曰漳河舊自安陽

豐樂鎮北東流過臨漳南又東北至館陶縣南入衛

正德庚辰秋水溢南決自安陽顯王村南流折而東

至崔家橋又東過永和呂村入衛袤百餘里當水盛

時廣四十里凡安陽土田悉注汙潦其患甚鉅萬金

渠在縣西北二十里深一丈五尺闊八尺鄴都故事

曰魏都鄴後起石塞堰自安陽南引洹水入鄴自鄴

入臨漳東至洹水縣當時溉田有萬金利因名高平渠源出縣西三十里自高平村堰洹水入渠東流灌溉至縣西南流至官道七里越道入廣潤陂

十七日從彰德府南行一路爛泥十五里魏家集十里二十里鋪路旁柳樹成陰西有美里城稍南有文王演易處碑離城七里過湯河石橋再進湯陰縣北門出東門東南行十五里迺至土岡又十五里到皮家莊天微雨將至屯頭見衛河有一道河從西來問

土人云有四十八里長雨水所積從山邊起二十里
到屯頭即衛河馬頭因水大兩岸樹木皆在水中又
大雨積水難行二十五里到大名府濬縣西門過橋
宿橋頗大兩邊俱有店房衛河自淇門入界受淇水
徑縣城西又東北受洹漳二水至直沽入海波羅河
在童山西麓白祀童山二陂在城西二十里亭子陂
在城西一里長豐泊在縣西二十里即白祀童山二
陂所匯每逢夏秋雨集水泛渰田後疏鑿成渠南起

交卸村北抵屯子鎮工成九十餘里野鮮沮洳蒸民
乃粒白龍潭黑龍潭在縣西南四十里一在大隄之
西一在大屯東南四時不竭井固潭在井固村其源
不測相傳中有水獸東北入衛檻泉在善化山下共
七十有二爾雅曰檻泉正出正出者涌出也近日湮
塞過多荆家砦張家窪王楓園石橋頭東陽澗西陽
澗大屯之大泉小泉則最著者梨水今湮沒無考黃
河故道縣西南自石濟徑黎陽遮害亭走大伾山下

南為黎陽津宋南渡後河身南徙流沙壅積山阜重疊大有深谷為陵之勢

十八日大雨不及行

十九日從濬縣西門繞城至南門南行二十五里至滑縣北門繞城至南門衛河水溢道上水積難行宿滑河在縣南徑北而東淇河一名王莽河冀州圖云西從河內界入黎陽慶臨河西十四里至王莽河東行永濟渠在慶臨河西北三十里自濬縣入界東北

入內黃界黃河故道在縣西北二里縣東北有苗固
魚池蔡胡諸陂皆河經流處今淤

二十日出滑縣北門稍東行三十里白馬陂有斬顏
良處碑西望大伾山東一帶白沙即黃河故道又四
十里至井泉鎮宿

二十一日從井泉鎮東北行約五十里至內黃縣因
雨大即宿

二十二日從內黃縣東北行四望雨水如河泥爛難

行辰刻雨止行三十里至雙黃集臨衛河由東北過
河河水泛溢兩崖立土頗高又二十里至泊口鎮北
行二十里過雙廟一名紅廟東北行二十餘里至魏
縣南門宿

二十三日從魏縣東南行四十里至大名府西門八
里至大名縣西門宿地形卑窪昔多衛漳水患今漳
水北遷廣平衛河修隄堅厚可無水患一路柳陰甚
盛

二十四日從大名縣北行繞大名府城東門外東北行三十五里至小灘鎮過衛河出鎮北門東北行數里淤沙一道寬五六里又三十五里到東昌府冠縣南門宿

二十五日從冠縣南門少西行五十里至館陶縣又東北行三十五里至孫兒寨宿

二十六日從孫兒寨東北行二十里過衛河河甚灣曲至東南復西北穿臨清州城入運河運河從東南

來為汶河十五里到臨清州進西門過運河至東門
佳飯後南行二里許至板閘看汶運衛三岔口交界
處本州城跨兩河新舊周連二十九里巍然巨觀由
水路沂會通出崇武遵淮泗 按汶水為會通河元
自安民山開渠道汶絕濟直抵臨清建牆三十有一
度地高下遠近以節蓄洩衛水為永濟渠始煬帝導
百門泉東北引淇滏漳洹之水為大河以巡幸名御
河或曰即漢屯氏河流八百里至元城又五百十里

入臨清牐四曰會通臨清

關

橋四曰廣濟弘

濟永濟通濟廣濟在衛河中弘濟在汶南支永濟俗
名天橋通濟石橋如牐制水漲涸以時蓄洩並在汶
北支洲一在汶衛環流之中財貨聚焉自元以來名
曰中洲其東砌以石如鼇頭突出築觀音閣于上四
牐建左右如足廣濟尾其後曰鼇頭磯俗謂觀音嘴
天下河渠涓滴之水皆關漕運餘俱不論論濟以北
東惟汶水發源泰安萊蕪至埭城挾沂泗南入漕北

流四百五十里達州西衛河出衛輝東北流九百五
里達州州受兩河之水合流北放千一百七十里抵
大通河距京師百六十里州實據河漕之喉當南北
之衝故曰第一津州舊設有牖有壩有淺鋪沿河穿
泉植柳以便漕惟汶流遇旱輒淺歲加浚挑如故蓋
關天時非人力也

二十七日出臨清城過河三十五里孔家集十五里
至竇父坊屯宿

二十八日從屯南行二十五里梁家淺四十里至東昌府北關又四十里至栖雞渡河東宿此一帶傍河河從府大灣直南北又一大灣餘小灣亦多

二十九日從栖雞繞河南行二十里窩城二十里張秋城北渡河出正南門西南行至大壩漫地皆水云係沙河水從西來者南壩實土北壩有三石洞桿船過水必須拔壩又西行路濕泥爛牲口俱陷地勢低窪者一望如河如此二十五里至扒河過大石橋宿

橋下水亦大東南流里許通沙灣入運河運河水發則有水少旱即乾其積水在曹州洪閘口

三十日從汴河口東南繞出大路行淤泥中二十五里至黑虎廟又東南繞小路二十五里過硝皮口又三十五里至鄆城縣西關宿

九月初一日從鄆城東南繞水行至西南三十里武安集二十五里鄧家樓二十五里清浪集俗呼沙土集宿一路因水大皆繞道行

初二日從沙土集西南繞道行三十里楊寡婦集三十里定陶縣又泥水路行五十餘里至曹縣東關宿初三日暫歇一日

初四日從曹縣東關東南行數里八里灣二十餘里過新月隄數里至護堤頭西望二里許傅家集大半埧入河中南行二里許至斷堤頭西乃一大埧灣埧斷河從西冲東復折西南行對岸亦係曹縣地一帶柳樹甚盛又從護堤東南行數里過桑村寺東小堤

頭東行二三里謝家集隄內東行十二里望魯集數里石香爐舊決口又數里下小堤東北行十餘里曹家集宿

初五日從曹家集東行十二里浮堽集即單縣界又東行數里外即董家營水渡口有月堤從馬家寺起至朱家樓前止八百餘丈係三堤縷河因水大難涉不及到又二三里至大王廟直北半里許即黃王廟直北半里許即黃堽集亦係大村莊又東行數里望

孟家樓河亦近從此東行三十餘里朱家樓格堤又數里姜家莊至馬良集宿

初六日從馬良集東南行數里王家莊上堤西去里許接單縣縷堤帶西北上東南透出皆成廢堤堤外郭家寨堤內朱家樓東行三十餘里王家堂永漲漫堤斷有四五十丈小船過口行數里范家集又十餘里盤龍集宿此一帶離河遠近不等立堤上皆不見河又因水漲一望汪洋大約此處對毛城鋪此堤

共長七十二里從盤龍集到堤頭止有二十二里至
徐州一百三十六里毛城鋪離徐州約一百四五十
里

初七日從蟠龍集東南行里許上堤東行十餘里孫
家寨至堤盡頭李道華雙樓下堤皆泥水路十餘里
又小堤行數里有南宮寺往東北行數里陳家樓東
南行二十里李伯調家集宿

初八日從東南水路行十八里李家集繞水行二十

里官莊從小堤行數里皆黃河近邊處東北望大谷
山小谷山南望王家山三面峯巒無數又行至河邊
有一樓及草房數間特出河岸急流衝激不至淹沒
下係石岸故也內即大谷山離河里許有石壩接到
小谷山之麓俱有柳樹村莊沿河灘行二十里至河
灘衝道一山獨高山足聳出河內水溜鏗然有聲此
為蘓家山又行二三里至徐州觀音門過渡沿城西
南行三四里至下洪宿簣箕山州城南九里東西有

二下有簸箕窪處久成湖南山之水交注于此民田
多汙萬厯間作二石狗鎮之湖終未底今賴奎山一
線瀉之泗水源出山東泗水縣陪尾山其源有四因
名其水由境山厯茶城南流至州城東北與汴水合
嘉靖間汴水北徙出秦溝泗水至茶城即與汴水合
循城東南以達于淮汴河一名沁河一名小黃河按
一統志汴源出河南滎陽縣大周山東流至中牟縣
入黃河沁河出山西沁源縣徑山東流至河南懷慶

府入黃河又按漕河志河居中汴居南沁居北河南
徙則與汴合北徙則與沁合故此立名有三今沁水
久不達惟河合于汴爾汴由西來勢甚湍悍迤州城
東北與泗水合故稱汴泗交流自嘉靖末從西北出
秦溝流至州城東南而下亦通塞靡恒至百步洪今
湮新洪城東南里許有橋呂梁洪城東南五十里共
長七里孔子觀于呂梁懸水見丈人即此九里溝城
東九里秦溝城東北三里隆慶中成大河今汴由之

夾溝城北六十里有驛有橋雙溝城東九十里有鎮
大彭溝龍溝湖澱溝揚尸溝皆在城西北三十餘里
與五河並分流以達于汴狼豕溝城東南二十里今
為黃河要衝潞河源出山東滕縣入昭陽湖薛河出
滕薛境西流會昭陽湖自金溝口達於泗

初九日登雲龍山有黃茅岡子房山諸舊蹟雲龍山
在州城南二里許時有雲氣蜿蜒如龍東巖有石峰
匝圍中峰因裝成大佛面方數丈覆以殿宇及諸大

士參差錯置

初十日從徐州下洪東堤行數里繞三山頭東南行三十里至楊家窪新埽工對岸張家橋東北即呂梁城因水大惟河堤高處始有人家過三山頭東行無山矣又數里至小店險埽工又十餘里至房村村落頗大八里至雙溝西有新沖口子過渡至雙溝宿此一帶堤外淤灘頗高堤內地窪如井南走四五十里乃靈璧磬石山羣山環繞離河甚遠

十一日從雙溝上堤東行數里轉東北行即綏寧縣界數里至豐山頭西邊低者為龍虎山西近河邊有小土岡上有廟對岸即王家山豐山對岸即鯉魚山復東南行至陳家樓又二十里對岸即鳳皇山稍東為董家樓內有靈壁一段張韓二堡椿工又東南行十里南行十里朱家樓內有王家塘余家塘孟家灣等處堤南有土山又東行十里至戴家樓險埽工二百三十餘丈又有一灣頂塘險工向東南又成韓家

莊險工向西北去又五工頭險工此處河身從西北繞東南至象山復往西北從東繞過邳州諸險工又東南行十里至韓家莊宿有大險工四百餘丈

十二日從塘東行數里火神廟南行數里復東南行魏家莊東行王家樓對岸即皂河口里許至張家嘴一帶有椿工已至睢宿界矣又東行數里蔡家樓險工往東南行彭家堡險工內皆有月堤又數里朱衣城九龍廟內有缺口水潭至小古城涉水至渡口過

宿遷至公署宿此一路南望皆平田水窪北岸馬陵山一帶黑土岡宿遷城後即在土岡上矣

十三日留宿遷公署

十五日從宿遷東南行過二郎廟蕭家渡楊家莊東行至河北鎮渡白洋河過草壩復西行望河自從西北來也又里許即歸仁堤起頭有閘兩邊有河堤西河往南頗寬至虹縣歸仁集有五十里石堤因瀉水開斷閘北有舊縷堤一道通鎮市南接草壩因天雨

不及遠去仍回白洋河宿

十六日從白洋河街行三里許桃源縣界至新堤頭
東南行三里許連著堤頭又行五里對岸古城又十
五里有草亭對岸九里岡險工又十五里西南一灣
又連幾灣至烟墩險工內有月堤上水壩臺甚長七
八里至桃源縣以土堤為城離堤約半里三里至龍
窩險埽工月堤內有潭水東行數里有草菴對岸王
家嘴又南行數里復東行五六里李家口大王廟地

方宿

十七日東行二十里復南行數里高家灣東行數里
西吳城內有舊縷堤對岸有吳城南去遙堤又南即
洪澤湖近來水漲堤北有千丈缺口田土皆水又東
行河邊陳家莊對岸玉皇閣險工又東對岸清河縣
此處舊時即張福口今斷又東上小橋過河從皮家
廠稍南過清口到甘羅城上岸河從清河縣西來順
清口北灣惠濟祠北始繞東行爛泥淺至惠濟祠乃

南北矣近因清水大皮家廠及清口皆清水又二十里至龍汪閘過橋進署

二十日早出署從西南行二十五里至武家墩上堤即洪澤湖高家堰之長堤也傍湖俱石岸可稱堅固惜太低不無水漲塌空之虞置有減水壩寬數丈又十五里至高家堰關帝廟內有碑文及御祭亭係明總河潘公季馴夢神授訣成功奏請建廟者也又二十里至石工頭從此皆木工矣二十里至高良澗有

減水壩又二十里至周橋宿云昔年此地亦通運道
今築斷置減水壩一座

二十一日早行五里許古溝東減水壩寬二十餘丈
又里許古溝西減水壩寬五十餘丈又數里至唐埂
減水壩闊四十餘丈又里許唐埂又十餘里即翟家
壩因有土埂最高不用築堤此去西北數里渡關家

口三十里可到老子山有數千家烟火商賈往來甚
多三面皆水淮水即出其西南陸路可通盱眙約八

十里盱眙至翟家壩止六十里壩之東去地土稍高
其堤東一帶地勢低窪一望惟見水草而已復回騎
過高良澗至高家堰宿

二十二日從高家堰過武家墩由橫堤至大墩視三
岔口出水以一半繞墩灌入運河置束水閘以緩其
勢不至直衝難受以一半歸助爛泥淺同入黃河北
處為新清口又從七里閘繞太山墩堤北岸有甘
羅城舊運河即甘羅而西南入運河因黃河灌淤今

改數里又北行新莊閘對岸惠濟祠又北行至文英
店望隔岸止以一堤而攔黃河矣又過鳳陽廠減水
壩至清江浦進署

是役也因靳公每年所進河圖俱不稱

旨浼予繪黃運兩河圖進呈然非親歷山川城郭則位
置豈能無誤於是束裝就道自五月十九日出河署
至九月十七日進署歷三省閱四月計程則萬有餘
里非揮汗於炎雲赤日之中即委頓於烈風暴雨之

下道途所經古蹟間志一二諸水源有關繫兩河者
俱一一考訂詳明至名山勝蹟具載各府州縣志書
不敢獵取以侈博雅雲間周洽竹岡氏識

看河紀程

行水金鑑卷一百六十三

欽定四庫全書

行水金鑑卷一百六十四

江南按察使傅澤洪撰

官司

舜曰咨四岳有能奮庸熙帝之載使宅百揆亮采惠疇
僉曰伯禹作司空帝曰俞咨禹汝平水土惟時懋哉禹
拜稽首讓於稷契暨皋陶帝曰俞汝往哉

舜典

據舜典有云歲二月東巡守至于岱宗五月南巡守

至于南岳八月西巡守至于西岳十有一月朔巡守
至于北岳覲四方諸侯而考制度其首協時月正日
同律度量衡夫其考制度既以律歷為先則四岳為
羲和四子必矣有能奮庸熙帝之載者謂有能奮起
其功以廣堯之事見於已試之效者將使之宅百揆
也蓋舜未即位凡在位者所以言事無非堯之事也
使宅百揆者將使之居度百官之任猶後世之為宰
相也亮采者輔相之義與寅亮天工之亮同爾雅曰

亮左右也以是知亮有輔相之義亮采者輔相朝廷之事疇如九疇之疇謂天下之事各以其類無不順也惠疇此蓋宰相之職也載事也采亦事也旣曰熙載又曰亮采者蓋前之所言熙堯之事見于已試之效也後之所言將責之以將來之效以亮舜之事也於是四岳同辭薦禹曰伯禹作司空蓋禹于是時以司空居平水土之任已有成績矣故四岳舉之將使舜自司空擢升百揆之任也薛氏以百揆為司空之

職其說失之矣俞者然其所舉也既然其所舉於是稱美其平水土之功而勉之曰惟時懋哉懋勉也禹拜稽首盡敬於君也讓於稷契暨皋陶所謂推賢遜能也俞然其所推之賢也汝往哉不許其讓也

林之奇尚

書全解

蒼叢云蔡傳解四岳謂以一人而總四岳

諸侯之事通考遂附會之曰四岳所領四方諸侯有在朝者皆非也林據孔傳謂即上羲和之四子亦未然愚意四岳即四方諸侯之長猶周之二伯也下文十有二牧即十二州牧則知四岳為四方諸侯長矣禹平水土有成績即擢升百揆之任今之司河者能盡厥職亦得入居黃閣豈得謂古今人遂不相及哉

季春之月命司空曰時雨將降下水上騰循行國邑周視原野修利隄防道達溝瀆開通道路毋有障塞月令廣平曰原國也邑也平野也溝瀆與道路皆不得不通所以除水潦便民事也古者溝上有路鄭康成注

夫司空掌土之官凡此所命皆土之事故以命焉時雨應時之雨也方春物生需雨澤之時故其雨謂之時雨時雨然或過濫則趨下之水反上騰而為災故命以預備之術也循行則行之有序周視則視之無遺修

利則修而利之使無害道達則道而達之使無壅開
通則開而通之使無窮皆欲其無有障塞而已障言
蔽顯以為隱塞言室虛而為實凡此皆預備水災之

術也

方懋禮記解義

此經言預備水災之術語語

與今之河政相關切月令之命司空乃行水者

之所當遵循而無怠者也道路即道路之有水者障

塞二字最有味不修利不道達不開通即為水所障

塞

孟秋之月命百官始收斂完隄防謹壅塞以備水潦

月令

順秋氣收斂物也八月宿值畢畢好雨完隄防謹壅

塞以備八月也

鄭注

陽為出故春主發散陰為入故秋主收斂聚土而壅之之謂壅升土而壅之之謂塞隄防大故欲完而全壅塞小故欲謹而慎凡此所以備水潦而已

禮記解義

夏氣舒發則修利隄防無有壅塞秋氣收斂則全隄防謹壅塞水在天地間最為流通不可壅之物而其盛衰消長亦因乎時夏潦不可隄也故修利而無壅秋潦則可隄矣必壅塞之唯謹雖一通一障不同而

其為民禦患則一而已

應鑄禮記纂義此經言百官猶之乎今之大小河官也

八月正秋汛之時完全隄防謹慎壅塞深得行水之精蘊矣

川衡每大川下士十有二人史四人胥十有二人徒百有二十人中川下士六人史二人胥六人徒六十人小川下士二人史一人徒二十人川衡掌巡川澤之禁

令而平其守以時舍其守犯禁者執而誅罰之

周禮

川流水也禹貢曰九川滌源舍其守者時按視守者

於其舍申戒之

鄭注

川衡者平知川之遠近寬狹及物之所出官及師徒多者以其川路長遠巡行勞逸故也中川小川之等自若常法故少差 水鍾曰澤澤與川不同官今川衡兼云澤者澤與川連者則川衡兼掌之謂若濟水溢為滎澤滎澤則與濟連則管濟川者兼滎澤掌之如此之類皆是 賈公彥疏

澤虞每大澤大數中士四人下士八人府二人史四人胥八人徒八十人中澤中數如中川之衡小澤小數如

小川之衡 澤虞掌國澤之政令為之厲禁使其地之人守其財物

周禮

澤水所鍾也水布曰數禹貢曰九澤既陂爾雅有八

數

鄭注

虞亦度也度知澤之大小及物之所出用中士尊於川衡者以其澤之所出物衆多胥徒少者以其巡行處近故也中澤小澤已下皆如川衡者自是常法山虞林衡川衡皆不言國獨澤虞云國澤者又有不

同皆互見

賈疏

王氏曰使其地之人守其財物則人自為守所以澤

雖大莫或害其養蕃 李嘉會曰澤屬乎國懼民因

地以致爭今海之沙岸潮之波渚凡利入之厚無不

租撲於官而後漁焉此之謂也

王與之周禮訂義按經言大澤大藪即

如今山東濟運之昭陽蜀山等湖江南潯水之射陽
汜光等湖以及山陽海州奉裁之葦蕩營是也為之
厲禁則小民不得侵占而容蓄之水足以濟運守其
財物則葦草不致荒蕪而刈獲之後足以供料豈不
大有裨于
河工者哉

掌固上士二人下士八人府二人史四人胥四人徒四

十人 掌修城郭溝池樹渠之固

周禮

樹枳棘之屬有刺者也

鄭注

掌修城郭溝池者謂環城及郭皆有溝池云樹渠者非直溝池有樹兼其餘渠上亦有樹也云之固者總城郭已下數事皆是牢固之事也

賈疏

劉執中曰浚溝之土所以為城也鑿池之土所以為郭也溝池深于外則城郭固于內用其深以增高也

渠又在其外所以出水因之設固植木其上守固之
材出焉 鄭鍔曰城郭本于築者有時而傾溝池本
於鑿者有時而塞樹則所植以為阻塞之木也渠則
所導以通不行之水也渠有時而淺涸樹有時而枯
槁則吾所依以為固者不足恃矣故掌固修之蓋治
壞之名也 周禮訂義 此經言掌固雖指固守疆圉
然樹渠二字似與河事相關渠水道樹植
柳渠以通水樹以固隄亦河
上之最要務也當倣而行之

司險中士二人下士四人史二人徒四十人 司險掌

九州之圖以周知其山林川澤之阻而達其道路設國之五溝五涂而樹之林以為阻固皆有守禁而達其道

路周禮

周猶徧也達道路者山林之阻則開鑿之川澤之阻則橋梁之五溝遂溝洫澮川也五涂徑畛涂道路也

樹之林作藩落也鄭注

開鑿之者謂若禹鑿龍門之類橋梁之者若十月輿

梁成之類是也

賈疏愚按川澤之阻疏云則橋梁之固矣此通達其陸路也若川澤有

壅塞處則疏浚之水路不
亦通乎二義相兼乃備

司空公一人本注曰掌水土事凡營城起邑浚溝洫修

墉防之事則議其利建其功凡四方水土功課歲盡則

奏其殿最而行賞罰

韓詩外傳曰山陵崩阨川谷不通五穀不植草木不茂則責之司空

世祖即位為大司空建武二十七年去大

建安十三年又罷司空置

御史大夫

屬長史一人千石掾屬二十九人

漢官目錄云二十四人

令

史及御屬四十二人 漢承秦凡山澤陂池之稅名曰

禁錢屬少府世祖改屬司農考功轉屬太僕都水屬郡

國孝武帝初置水衡都尉秩比二千石別主上林苑有離宮燕休之處世祖省之并其職於少府每立秋疆劉之日輒暫置水衡都尉事訖乃罷之少府本六丞省五又省水衡屬官令長丞尉二十餘人州郡皆置諸曹

掾史

漢官曰監津渠漕水掾二十五人
後漢書百官志

初秦漢又有都水長丞主陂塘灌溉保守河渠自太常少府及三輔等皆有其官漢武帝以都水官多乃置左右使者以領之至漢哀帝省使者官至東京凡

都水皆罷之并置河隄謁者 漢有水衡丞五人亦有都水丞後漢都水使者有參軍二人蓋亦丞之職任 舟楫署令漢主爵中尉屬官有都船令丞水衡都尉有楫櫂令丞

文獻通考

水衡都尉從第五品 都水使者從第五品 河防謁者第六品下 監淮海津都尉從第六品中 永平二年正月尚書令高肇奏都水臺請依舊二使者參軍事謁者并錄事令史亦隨事更立詔曰使者置二可如所

奏其下屬司唯須充事耳亦何勞多也參軍錄事並更
置一謁者加二令史依舊肇又奏諸州諮議記室戶曹
刑獄田曹水曹集曹士曹參軍悉并省之

魏書官氏志

魏尚書郎有水部晉武帝受命置水部後又置運漕凡
三十五曹康穆以後有水部後又省大司農統都水
長東西南北部護曹掾及渡江哀帝省并都水孝武復
置侍御史有水曹都水使者漢水衡之職也漢又
有都水長丞主陂池灌溉保守河渠屬太常漢東京省

都水置河隄謁者魏因之及武帝省水衡置都水使者一人以河隄謁者為都水官屬及江左省河隄使者置謁者六人 諸州置都水從事各一人 晉書職官志

晉元康中初都水使者有參軍二人復有水衡都尉有主簿為前後左右中五水衡令悉皆有之又有船

曹吏 文獻通考

司空一人掌水土事舜攝帝位以禹為司空契之子曰冥亦為夏司空殷湯以咎單為司空周時司空為冬官

漢西京初不置成帝綏和元年更名御史大夫為大司空哀帝建平二年復為御史大夫元壽二年復為大司空光武建武二十七年去大字獻帝建安十三年又罷司空置御史大夫魏初又置司空

世魏晉景帝為大司

空置掾十人有水曹一人無屬 咸熙中晉文帝為相

國有水曹掾屬各一人 晉楊駿為太傅掾屬有水曹

置屬 趙王倫為相國亦置掾屬四十人

其中必有水曹

宋

高祖為諮議諸曹有水曹 初晉元年鎮東丞相府有

運漕其後又有水曹高祖為相曹則猶二也 尚書晉

西朝有水部曹又有運曹江左有運曹康穆以來猶有

水部曹後又省 宋高祖初加置水部 侍御史晉西

朝有水曹凡十三曹而置御史九人 都水使者一人

掌舟航及運部

此宋世之事

秦漢有都水長丞主陂池灌溉

保守河渠屬太常東漢省都水置河隄謁者魏因之漢

世水衡都尉主上林苑魏世主天下水軍舟船器械晉

武帝省水衡置都水使者而河隄為都水官屬有參軍

二人謁者一人令史減置無常員晉西朝有參軍而無謁者謁者則江左置也懷帝永嘉六年胡入洛陽都水使者爰濬先出督運得免然則武帝置職便掌運矣江

左省河隄

此追叙晉世之事

都水使者第四品 參軍謁者

第七品

此又宋世之品級也 宋書百官志

宋孝武帝孝建元年冬十一月癸卯復立都水臺置都

水使者官

宋書孝武帝本紀

宋都水使者有參軍二人

文獻通考

凡諸將軍公督府諸曹有水曹 都官尚書有水部曹
南齊書

齊有都水臺使者一人有官船典軍 梁初亦有都
水臺使者一人又有大舟卿有丞有主簿陳因之

後魏北齊有水部屬都官尚書掌舟船津梁之事亦
置都水臺二使者有參軍後周有司水大夫小司水
上士有舟中士 文獻通考

隋尚書省有水部郎 天監七年以都水使者為大舟

卿是為冬卿置丞及功曹主簿 大舟卿梁初為都水
臺使者一人參軍事二人河隄謁者八人七年改焉位
視中書郎列卿之最末者也主舟航隄渠陳承梁皆循
其制 隋書百官志

隋初有水部侍郎屬工部煬帝除侍字 開皇二年
廢都水臺入司農十三年復置仁壽元年改臺為監
更名使者亦為監煬帝又改為使者尋又為監加置
少監又改監及少監並為令領舟楫河渠二署 都

水有丞舟楫署有令丞煬帝置河渠署令丞各一人
文獻通考

唐工部尚書其屬有四四曰水部凡津梁道路治以九月水部主事二人龍朔二年改水部曰司川天寶十一載改水部曰司水水部令史四人書令史九人掌固四人水部郎中員外郎各一人掌津濟船艦渠梁隄堰溝洫漁捕運漕之事京畿有渠長斗門長諸州隄堰刺史縣令以時檢行而蒞其決築有埭則以下戶分牽禁

爭利者 都水監使者二人正五品上掌川澤津梁渠
堰陂池之政總河渠諸津監署凡漁捕有禁漑田自遠
始先稻後陸渠長斗門長節其多少而均焉府縣以官
督察 丞二人從七品上掌判監事凡京畿諸水因灌
漑盜費者有禁水入內之餘則均王公百官 主簿一

人從八品下掌運漕漁捕程會而糾舉之

武德初廢都水監為署貞

觀六年復為監改令曰使者龍朔二年改都水監曰司
津監使者曰監武后垂拱元年改都水監曰水衡監使
者曰都尉開元二十五年不隸將作監有錄事一人府
五人史十人亭長一人掌固四人初貞觀六年置舟楫

署有令一人正八品下掌舟楫運漕漕正一人府三人
史六人監漕一人漕史一人典事六人掌固八人上元
二年置丞二人正九品下掌運
漕隱失開元二十六年署廢
河渠署令一人正八品

下丞一人正九品上掌河渠陂池隄堰魚醢之事凡溝
渠開塞漁捕時禁皆顓之饗宗廟則供魚鮓祀昊天
帝有司攝事則供腥魚日供尚食及給中書門下歲供
諸司及東宮之冬藏渭河三百里內漁釣者五方捕治
之供祠祀則自便橋至東渭橋禁民漁三元日非供祠

不採魚

唐有河隄使者貞觀初改曰河隄謁者有府三
人史六人典事三人每渠及斗門有長一人掌

固三人魚師十三人初有監漕十人從九品上大厯後省輿成五門六門龍首涇堰滋隄凡六堰皆有丞一人從九品下府一人史二人典事河隄謁者六人正八品一人掌固二人貞觀六年皆廢

下掌完隄堰利溝瀆漁捕之事涇渭白渠以京兆少尹

一人督視諸津令各一人正九品上丞二人從九品

下掌天下津濟舟梁壩橋永濟橋以勳官散官一人蒞

之天津橋中橋則以衛士拊埽凡舟渠之備皆先擬其

半和塞竹簞所在供焉

唐改津尉曰令有錄事一人府一人史二人典事三人津吏五

人橋丁各三十人匠各八人京兆河南諸津隸都水監便橋渭橋萬年三橋有丞一人從九品下府一人史七

人典事二人掌固二人貞
觀中廢唐書百官志

唐工部尚書一員

正三品南朝謂之起部有所營造則置起部尚書畢則省之隋初改置工

部尚書龍朔為司平太常伯光宅改為冬官尚書神龍復舊也

侍郎一員

正四品下龍朔為司平少

常伯尚書侍郎之職掌天下百工屯田山澤之政令其屬

有四一曰工部二曰屯田三曰虞部四曰水部總其職

務而行其制命凡中外百司之事由于所屬咸質正焉

水部郎中一員

從五品上龍朔為司川大夫

員外郎一員

從六品上主

事二人

從九品上

令史四人書令史九人掌固四人

郎中

員外郎之職掌天下川瀆陂池之政令以導達溝洫堰
決河渠凡舟楫漑灌之利咸總而舉之凡天下水泉三
億二萬三千五百五十九其在遐荒絕域殆不可得而
知矣其江泗自西極達于東溟中國之大川者也其餘
百三十五水是為中川其又千二百五十二水斯為小
川也若渭洛汾濟漳淇淮漢皆亘達方域通濟軸轡從
有之無利於生人者也凡天下造舟之梁四河則蒲津
大陽河陽
洛則孝
義也石柱之梁四洛則天津永濟
中橋霸則霸橋木柱之梁三皆渭
川便

橋中渭橋東渭橋也

巨梁十有一皆國工修之其餘皆所管州縣

隨時營葺其大津無梁皆給船人量其大小難易以定

其差

都水監使者二人

正五品上漢官有都水長屬主爵掌諸池沼後改為使者

後漢改為河隄謁者晉復置都水臺立使者一人掌舟楫之事梁改為大舟卿北齊亦曰都水臺隨改為都水監大業復為使者尋又為監復改監為令品第三武德復為監貞觀改為使者從六品龍朔改為司津監光宅為水衡都尉神龍復為使者正五品上仍隸將作監使者掌川澤津梁之政令總

舟楫河渠二署之官屬凡虞衡之採捕渠堰陂池之壤

決水田斗門灌溉皆行其政令丞二人

從七品上

主簿二人

從八品下錄事一人府五人史十人掌固三人舟楫署令

一人正八品下丞二人正九品下舟楫署令掌公私舟船運漕之

事河渠署令一人正八品下丞一人正九品上府三人史六人

河隄謁者六人掌修補隄堰漁釣之事典事三人掌固

四人長上漁師十人短番漁師一百二十人明資漁師

一百二十人河渠令掌供川澤魚醢之事祭祀則供魚

醢諸司供給魚及冬藏者每歲支錢二十萬送都水命

河渠以時價市供之諸津令一人正九品上丞一人從九品下

津令各掌其津濟渡舟梁之事

舊唐書職官志

五代史無職官志唐臣蕭希甫傳有河堰牙官李筠告本軍謀反周本紀顯德五年秋七月乙酉水部員外郎韓彥市銅於高麗二事則五代時亦有水部與都官屬官矣餘無聞

小谷口舊叢

晉天福二年九月判詳定院梁文舉奏以前汴州楊武縣主簿左墀進策十七條可行者四其一請于黃河夾岸仍防秋水暴漲差上戶充隄長一年一替委

本縣令十日一巡如怯弱處不早處置旋令修補致
臨時偷決有害秋苗既失王租俱為隨事隄長處死
縣令勒停敕曰修葺河岸深護田農每歲差隄長巡
檢深為濟要逐旬遣縣令看行稍恐煩勞隄長可差
縣令宜止四月詔曰近年以來大河頻決漂蕩人戶
妨廢農桑言念蒸黎因茲凋弊凡居牧皆委山河既
在封巡所宜專功起今後宜令沿河廣晉開封府尹
逐處觀察防禦使刺史等並兼河隄使名額任便差

選職員分擘勾當有隄堰薄怯水勢衝注預先計度

不得臨時失于防護

治河通考

宋工部尚書掌百工水土之政令稽其功緒以詔賞罰
侍郎為之貳 水部郎中員外郎掌溝洫津梁舟楫漕
運之事凡隄防決溢疏導壅底以時約束而計度其歲
用之物修治不如法者罰之規畫措置為民利者賞之
分案六置吏十有三紹興累減吏額 都水監舊隸三
司河渠案嘉祐三年始專置監以領之判監事一人以

員外郎以上充同判監事一人以朝官以上充丞二人主簿一人並以京朝官充輪遣丞一人出外治河埽之事或一歲再歲而罷其有諳知水政或至三年置局于澶州號曰外監元豐正名置使者一人丞二人主簿一人使者掌中外川澤河渠津梁隄堰疏鑿浚治之事丞參領之凡治水之法以防止水以溝蕩水以澮瀉水以陂池緒水凡江淮海所經都邑皆頒其禁令視汴洛水勢漲涸增損而調節之凡河防謹其法禁歲計筭捷之

數前期儲積以時頒用各隨其所治地而任其責興役以後月至十月止民功則隨其先後毋過一月若導水溉田及疏治壅積為民利者定其賞罰凡修隄岸植榆柳則視其勤惰多寡以為殿最南北外都水丞各一人都提舉官八人監埽官百三十有五人皆分職蒞事即干機速非外丞所能治則使者行視河渠事元豐八年詔提舉汴河隄岸司隸本監先是導洛入汴專置隄岸司至是亦歸之元祐四年復置外都水使者五年詔南

北外都水丞並以三年為任七年方議回河東流乃詔
河北東西漕臣及開封府界提點各兼南北外都水事
紹聖元年罷元符三年詔罷北外都水丞以河事委之
漕臣三年復置重和元年工部尚書王詔言乞選差曾
任水官諳練者為南北兩外丞從之宣和三年詔罷南
北外都水丞司依元豐法通差文武官一員分案七置
吏三十有七所隸有街道司掌轄治道路人兵若車駕
行幸則前期修治有積水則疏導之建炎三年詔都水

監置使者一員紹興九年復置南北外都水丞各一員
南丞于應天府北丞于東京置司十年詔都水事歸于

工部不復置官

宋史職官志

宋太祖乾德五年正月詔開府大名府鄆澶滑孟濮齊
滋滄埭濱德博懷衛鄭等州長吏並兼本州河隄使蓋
以謹力役以重水患也

宋史河渠志

宋太祖開寶五年三月詔曰朕每念河渠潰決頗為民
患故署使職以總領焉宜委官聯佐治其事目今開封

等十七州府各置河隄判官一員以本州通判充如通判缺員即以本州官充

宋史河渠志

宋太宗淳化二年三月詔長吏以下及巡河主埽使臣經度行視河防勿致壞隄違者當寘于法

宋史河渠志

宋真宗咸平三年詔緣河官吏雖秩滿須水落受代知州通判兩月一巡隄縣令佐迭巡隄防轉運使勿委以他職

宋史河渠志

宋仁宗皇祐三年五月壬申置河渠司

宋史仁宗本紀

宋仁宗嘉祐三年十一月己丑置都水監罷河渠司

宋

史仁宗本紀

宋神宗熙寧四年命程昉為都大提舉黃御等河

宋史

河渠志

宋神宗熙寧六年四月始置疏濬黃河司自衛州浚至海口人船木鐵工匠皆取之諸埽官吏俸給視都水監

丞司行移與監司敵體

宋史河渠志

宋神宗熙寧九年九月丙寅詔罷都大制置河北河防

水利司

宋史神宗本紀

宋神宗元豐三年五月甲申詔改都大提舉蕆洛通汴

司為都提舉汴河隄岸司

宋史神宗本紀

宋哲宗元祐四年復置修河使

宋史河渠志

宋哲宗元祐五年罷修河使及檢舉

宋史河渠志

宋哲宗元祐七年四月詔南北外丞司管下河埽今後

令河北京西轉運使副判官府界提點分認界至內河

北仍于御內帶兼管南北外都水公事

宋史河渠志

宋哲宗紹聖二年詔武進丹陽丹徒縣界沿河隄岸及石礎石木溝並委令佐檢察修護勸誘食利人戶修葺任滿稽其勤惰而賞罰之從工部之請也

宋史河渠志

宋哲宗元符三年七月復置北外都水丞司

宋史河渠志

宋徽宗崇寧元年十二月置提舉淮浙澳牐司官一員掌杭州至揚州瓜洲澳牐凡常潤杭秀揚州新舊等牐通治之

宋史河渠志

宋徽宗政和五年置提舉修繫永橋所

宋史河渠志

宋徽宗宣和四年臣僚言都水監因恩州修河舉辟文武官至百二十餘員授牒家居不省所領何事皆垂傳給券第功希賞詔除正官十一員外餘並罷所隸有東京四排岸司監官各以京朝官閣門祇候以上及三班使臣充掌水運綱船輸納顧直之事汴河上下鎖蔡河上下鎖各監官一人以三班使臣充掌算舟船木筏之事天下堰總二十一監官各一人渡總六十五監官各一人皆以京朝官三班使臣充亦有以本處監當兼掌

者 宋史河渠志

行水金鑑卷一百六十四